

**Najib Optimistik Namun Berhati-hati Terhadap Unjuran Ekonomi Negara  
Bernama  
12 Jun, 2012**

KUALA LUMPUR, 12 Jun (Bernama) -- Perdana Menteri Datuk Seri Najib Tun Razak optimistik namun berhati-hati terhadap unjuran ekonomi negara bagi tempoh akhir tahun ini dan tahun depan.

Beliau berkata ekonomi negara berdaya tahan, terutama sejak kerajaan melaksanakan reformasi menerusi Program Transformasi Kerajaan (GTP) dan Program Transformasi Ekonomi (ETP), namun terdapat risiko ekonomi global menguncup, yang perlu diberikan perhatian.

Najib berkata demikian ketika ditanya mengenai pandangan beliau terhadap unjuran ekonomi negara bagi tempoh lewat tahun ini dan tahun depan pada "seimbang dalam talian" dengan orang ramai menerusi NSTLive Selasa.

Ditanya sama ada kerajaan akan meneruskan Bantuan Rakyat 1Malaysia (BR1M) untuk golongan miskin dan sama ada jumlahnya melebihi RM500, Najib berkata: "Saya akan melihat aliran tunai kerajaan bagi memutuskan sama ada kita mampu melaksanakan BR1M dan pada masa yang sama memastikan disiplin fiskal."

Najib yang juga Menteri Kewangan menegaskan kerajaan hari ini ialah kerajaan rakyat yang perhatin terhadap keperluan rakyat dan pada masa yang sama mengekalkan tanggungjawab fiskal.

Beliau juga berkata kerajaan menyediakan sesuatu untuk rakyat dalam Belanjawan 2013 yang akan dibentangkan di Parlimen pada 28 September.

"Anda kena tunggu pembentangan Belanjawan," katanya ketika ditanya sama ada terdapat "habuan" untuk semua lapisan penduduk pada belanjawan akan datang.

Mengenai perbelanjaan besar kerajaan seperti bantuan tunai kepada golongan miskin dan bukan pembangunan jangka panjang seperti pendidikan dan penjagaan kesihatan, Najib berkata: "Kita ada cara untuk melaksanakan kedua-duanya. Berdasarkan maklum balas, kami sudah mengenal pasti bahawa pengurangan kos hidup merupakan keutamaan rakyat.

"Itu sebab saya mengumumkannya sebagai langkah jangka pendek, namun untuk langkah jangka panjang, kami menanganinya menerusi usaha seperti meningkatkan gaji penjawat awam antara tujuh dan 13 peratus, memperkenalkan gaji minimum untuk sektor swasta dan menyediakan lebih banyak pekerjaan menerusi program ETP," katanya.

Mengenai manfaat warga kelas pertengahan menerusi GTP, beliau berkata kerajaan perlu mengkaji beberapa insentif yang boleh ditimbang dari semasa ke semasa.

Sementara itu, Najib berkata keupayaan kerajaan untuk mewujudkan lebih banyak pekerjaan bergaji tinggi dan kekayaan, juga akan memberi manfaat kepada kelas pertengahan bersama insentif lain seperti program perumahan, meningkatkan pengangkutan awam dan program kesihatan.

"Dalam tempoh sederhana, kerajaan akan mengkaji struktur percukaian dan insentif yang boleh disediakan kepada golongan kelas menengah," kata Perdana Menteri semasa ditanya mengenai insentif untuk pekerja swasta yang menerima gaji peringkat pertengahan.

Najib berkata ia tertakluk kepada keupayaan kerajaan untuk menstruktur semula asas perolehan negara.

"Jika kita boleh tingkatkan sumber pendapatan, kerajaan boleh menimbang pengurangan jangka sederhana cukai pendapatan peribadi dan menyediakan lebih banyak insentif," katanya.

Sementara itu, Najib berkata kerajaan kini dalam proses menangani jurang kemiskinan digital luar bandar di Sarawak, dengan akses kepada Lebuhraya Maklumat untuk pelajar terhad hanya kepada makmal teknologi maklumat di sekolah.

-- BERNAMA

Hak Cipta Terpelihara © 2012 BERNAMA

Source: <http://www.bernama.com/bernama/v6/bm/newsindex.php?id=672328>